

Kua oti, tuturu rawa, te kupu a Te Pihopa Hou o Waiapu me Te Pihopa o Aotearoa kaore raua e haere ki te Lambeth Conference, 1930.

NGA MIHI AROHA

He huringa tau tenei ka whakaeke, na reira me puta atu nga mihi ki nga mea tuku korero mai mo te pepa, otira ko nga mea rawa hei mihina atu ko Takuta Wirepa, R. T. Kohere Tuhi Taare, Rangataua, Te Taite Te Tomo, Rev. Eruini Tikao me Ihaia Hutana. Takuta Te Rangihiroa. Kia ora katoa koutou i roto i Te Tau Hou.

KUA MATE A AMIRIA

No te ahiahi o te Ratapu nei te 15 o nga ra o Tihema nei ka hemo a Amiria, te pouaru a Nepe Te Apatu o Waipawa. I mate ki te hohipera i Te Waipukurau. He roa te wa e oke ana ia i runga i tona mate. Kanui ra te kaha o te kuia nei ki te whawhai i tenei mate taumaha, tupono iho kua kaumatuatia katahi ka uaua rawa tenei ngaki taumaha. Haere e kui! Kua taea e koe te whika a te karaipiture i homai ai. Kua nuku ou tau i te waru tekau. I whai kaha rawa koe!

Haere i runga i te ringa kaha o te kaumatuatanga. He nui nga mihi me nga whakamihare ki tou kaha me tou manaaki i nga tikanga a o tungane i waihotia ake kia koutou: i tenei ra kua tutuki i a koe.

Waiho ake te aroha me te tangi ki tau whanau me au mokopuna ka ki nei o marae maha i te atahua o te tangata me te wahine. Haere i runga i te rangimarie te aroha.

Waiho ake te reo o Te Toa Takitini hei mau atu i reo o tamariki o mokopuna ki o marae maha i te motu. mo ou kawai maha i peka ki tena wahi ki tena wahi. Ma o karanga maha me o manaaki e rongo ka haere mai ki te kawae mai i te roimata e tika nei kia nui te heke mou.

Haere kia Te Kakakura, kia Taipua, kia Taitoko, kia Te Whiti, kia Tohu, kia Te Wherowhere, kia Te Kani-a-Takirau, kia Wpere raua ko Pitau, Kia Huata, kia Te Wainohu, kia Whaanga, kia Kereru, kia Te Heuheu, kia Taiaroa, kia Tamahau, me o tungane maha kua haere atu i mua ia koe.

Whakangaro atu ra e kui ki tua o te pae!